

Tge succeda ussa cun las cabinas da telefon?

■ (anr) Las cabinas da telefon èn passé en consequenza dal success fenomenal dals smartphones (sco quai ch'il magazin american «Forbes» ha communitgà ha per exempel Apple entschavi ils 19 da settember cun la vendita dad iPhone 6 ed iPhone 6 plus e gia èn pli che 20 milliuns exemplars davent). E tge duai succeder en Svizra cun las cabinas da telefonar sch'ellas na vegnan betg pli duvradas? A Londra vegnan quellas per sumeglia applitgadas sco staziuns da chargiar ils handys.

Er en Svizra vegnan las 4850 cabinas da telefon, numnadas publifons, duvradas adina damain. Pli che 1000 cabinas da telefon na vegnan dis ora betg nizzegiadas. Da 2004–2013 èn ils telefonats en quellas

cabinas sa reducids per 60%. Ma la Swisscom vegn er a laschar ils proxims onns quels publifons siond ch'els s'audian tar il provediment da basa.

Da l'autra vart vul la Swisscom adattar ils publifons a las circumstanzas sa midadas tar la clientella. Ella tschertga perquai schliaziuns ensemèn cun las vischnancas. Là nua ch'il basegn n'è betg dà duaian quellas cabinas vegnir serradas, dentant be sche las vischnancas èn d'accord. I n'haja zunt nagin senn da mantegnair infrastructures na duvradas.

I dat er exempels per in niz creativ da las cabinas da telefon. A Neggio (TI) vegn ina cabina da telefon, messa ord servetsch, duvrada sco minibiblioteca publica.



Là nua ch'il basegn n'è betg dà duaian las cabinas da telefon vegnir serradas, dentant be sche las vischnancas èn d'accord.